

INUIT ATAQATIGIIT

Inatsisartuni



24/5-2023

Inatsisartut Suleriaasianni § 37 imm. 1 naapertorlugu Naalackersuisunut apeqquq imaattoq matumuuna saqqummiuppara.

Naalackersuisunut apeqquq:

1. Inatsit Tunngaviusussaq pillugu Isumalioqatigiissitat isumaliutissiissutaat marsip 31-anni 2023 Naalackersuisunut tunniunneqarpoq, aqqissuunneqareerlunilu apriliip 23-anni Inatsisartunut tunniunneqarluni. Isumaliutissiissutip naqitanngorluni innuttaasunut agguanneqarnissaa pilersaarutigineqarpa taamaappallu tamanna qaqugu pissava?
2. Inatsit Tunngaviusussaq pillugu Isumalioqatigiissitat suliarfik naammassivaat, allaffillu matuneqarpoq apriliip 1-ani 2023. Isumaliutissiissutip malitsigisaanik qanoq suleriaqqittoqarnissaa pilersaarutigineqarpa?

(Inatsisartunut ilaasortaq Mariia Simonsen, Inuit Ataqatigiit)

Tunngavilersuut:

Inatsit Tunngaviusussaq pillugu Isumalioqatigiissitat suliaat naammassivoq, suliarfik tunniussimalerpaat. Allaffiat matuvoq, isumaliutissiissutillu innuttaasunit oqallisigineqarnissaa innersuussutigineqarpoq.

“1. april 2023

Isumalioqatigiissitat ulloq 31. marts 2023 Naalackersuisunut isumaliutissiissut tunniuppaat. Taassuma kingorna Naalackersuisut suliaq kusanartumik Inatsisartunut tunniunneqarnissaanut inaarsarsimavaat, Inatsisartunullu isumaliutissiissummik tunniussineq pisimavoq 28. april 2023 Ilisimatusarfiup inersuaani. Inatsit tunngaviusussaq pillugu Isumalioqatigiissitat isumaliutissiissutaat saqqummersitat ataani nassaariuk.

Isumalioqatigiissitat suliarfik naammassimmassuk taamaattorlu allattoqarfik matulluni, saaffiginnissutit apeqququllu Naalackersuisut Siulittaasuata Naalackersuisoqarfianut innersuussutigissavagut.”

(www.tunngavik.gl)

Apeqququtit ullut qulit qaangiutsinnagit akineqarsinnaappata qujassaanga.